

四庫全書

子部

欽定四庫全書

子部

廣博物志卷二

詳校官侍讀學士

臣沈威熙

主事

臣

祁韻士覆勘

總校官知縣

臣

楊懋珩

校對官中書

臣

石鴻翥

膳錄監生

臣

毛敬事

欽定四庫全書

子部十一

廣博物志

類書類

提要

臣等謹案廣博物志五十卷明董斯張撰斯張字遐周烏程人國子監生以洽聞周見有聲於時所著述甚多此書名為廣張華博物志而作其實分門隸事名目瑣碎頗近後世類家與博物志原例不甚相合書中分大目

二十有二子目一百六十有七所載始於三墳迄於隋代詳畧互見未能首尾賅貫其徵引諸書皆標列原名綴於每條之末體例較善而中間亦有舛駁者如太平御覽太平廣記皆採摭古書原名具在乃斯張所引出自二書者徃徃但題御覽廣記之名而沒所由來殊為不明根據又圖經不言某州地志不言某代隨意剽掇亦頗近於稗販又漢雜事

秘辛為楊慎偽作世所共知乃好異喜新雜
然並載更不免疎於持擇至若孔疏鄭箋牽
連滿幅道經釋典採錄盈篇愛博貪多尤傷
枝蔓然其蒐羅既富唐以前之遺文墜簡裒
聚良多在明代類書中固猶為有資於淹雅
者矣乾隆四十五年十二月恭校上

總纂官

臣紀昀
臣陸錫熊
臣孫士毅

總校官

臣陸費墀

欽定四庫全書

廣博物志卷一

明 董斯張 撰

天道上

天 日 月

天道尚右日月西移地道尚左水道東流人道尚中耳目役心心有四佐不和曰廢地有五行不通曰惡天有四時不時曰凶天道曰祥地道曰義人道曰禮

周書

太初氣之始也生於酉仲清濁未分也太始形之始也

生於戌仲

八月酉仲為太初屬雄九月戌仲為太始屬雌

清者為精濁者為形

也太素質之始也生於亥仲已有素朴而未散也三氣

相接至於子仲剖判分離輕清者上為天重濁者下為

地中和為萬物

詩緯曰陽本為雄陰本為雌物本為龜雄雌但行三節而雄合物龜號曰太素

也三未分別號曰渾淪○廣雅

天者何也天之為言鎮也居高理下為人鎮也地者易

也言養萬物懷任交易變化也

白虎通

天以不見為玄地以不形為玄人以心腹為玄天奧西

北鬱化精也地奧黃泉隱魄榮也人奧思慮含至精也

太玄經

天有七星地有七表天有四維地有四瀆

河圖括地象

天有精地有形天有八紀地有五岳

素問

天以六六為節地以九九制會

上

天道以九制地理以八制人道以六制

管子

天左舒而起牽牛地右闢而起畢昴

尸子

黃帝書曰天在地外水在天外水浮天而載地者也

書

天象蓋笠地法覆盤

周髀

天青黑地黃赤天數之為笠也青黑為表丹黃為裏以

象天地之位上

春為蒼天夏為昊天秋為旻天冬為上天

爾雅

臣覽太始天元冊文丹天之氣經於牛女戌分齡天之
氣經於心尾已分蒼天之氣經於危室柳鬼素天之氣
經於亢氐昂畢玄天之氣經於張翼婁胃所謂戊已分

者奎壁角軫則天地之門戶也

素問

九天一中天二羨天三從天四更天五晬天六廓天七

咸天八沈天九成天

太元經

中央曰鈞天其星角亢氐東方曰蒼天其星房心尾東

北曰昊天其星箕斗牽牛北方曰玄天其星須女虛危

營室西北方曰幽天其星東壁奎婁西方曰昊天其星

胃昂畢西南方曰朱天其星觜雉參東井南方曰炎天

其星輿鬼柳七星東南方曰陽天其星張翼軫

淮南子

天有十端天地陰陽水土人金木火凡十端天亦有喜
怒哀樂與人相副以類合之天人一也

春秋
繁露

四時者天之吏也日月者天使之使也星辰者天之期也

虹蜺彗星者天之忌也

淮南子

天者誠日其德也日誠出誠入南北有極故莫弗以為
法則天者信月其期也月信死信生終則有始故莫弗
以為政天者明星其稽也列星不亂各以序行故大小
莫弗以章天者因時其則也四時常相代而不干故莫

弗以為必然天者一法其司也前後左右古今自如故

莫弗以為常天誠信明因一不為衆人易德故莫能與

爭先

鵬冠子

保章氏

官屬如馮相氏。官也。世守天文之變。

掌天文以志星辰日月之

變動

天左轉日月五星右行故變動而無常

以觀天下之遷

天下灾祥禍福之遷遇者

因可得而觀焉

辨其吉凶以星土辨九州之地所封

星土星所主土也封

猶界也

封域各有分星

角亢氐兖州房心豫州尾箕幽州斗牛女揚州虛危青州室壁井州

奎婁胃徐州昂畢冀州觜參益州井鬼雍州柳星張三河翼軫荊州以觀妖祥

觀彗孛客星所犯屬

何分野主何妖祥

以十有二歲之相觀天下之妖祥

歲星在木則火為相

在火則土為相在土則金為相在金則水為相在水則木為相五星順度為祥流逆失度為妖

以五雲

之物辨吉凶水旱

雲有五色以二分二至日觀之青為蜺白為喪赤為兵荒黑為水黃為豐

降豐荒之祲象

降其祲象於國使人預知而為備也

以十有二風察天地

之和

十二風者風生於十二辰之位也天地之氣和而成風和則無事

命乖別之妖祥

乖則異別則離此天地之不和而為妖祥也故命之以告於人焉

凡此五物者以詔救

政訪叙事

謀訪天時所宜次序其事○周禮

眡祲

官屬如掌十煇之法

煇謂日之氣煇光也

以觀妖祥辨吉凶

一曰侵

日旁有陰邪氣相侵犯也

二曰象

陰氣附日凝結而成象也

三曰鑄

黑氣如鑄

刺於日也

四曰監

抱日之氣如冠珥也

五曰闇

方晝而暗也

六曰曹

陰氣蒙蒙日光

也

七曰彌

白虹彌天橫貫日也

八曰叙

片段成列穿日有序也

九曰隳

蟬竦升氣於日旁也

十曰想

襟氣以成形想也

○掌安宅叙降正歲則行

事歲終則弊其事

上

天地渾沌如雞子盤古生其中萬八千歲天地開闢盤古在其中一日九變神於天聖於地天日高一丈地日厚一丈盤古日長一丈如此萬八千歲天數極高地數

極深盤古極長後乃有三皇數起於一立於三成於五

盛於七處於九故天去地九萬里

三
五
歷記

百世之後地高天下不風不雨不寒不暑民復食土皆
知其母不知其父如此千歲之後而天可倚杵淘淘莫

知始終

河圖挺
佐輔

問云諸天衣服云何答曰如經說六欲界六天中皆服
天衣飛行自在看之似衣光色具足不可以世間繒綵比之
色界諸天衣服雖號天衣衣如非衣其猶光明轉勝轉

妙不可名也

法苑珠林

忉利天衣重六銖炎摩天衣重三銖兜率陀天衣重一銖半化樂天衣重一銖他化自在天衣重半銖

問曰諸天住處其義云何答曰如婆沙論說天雖有三十二住處但有二十八重以彼四空絕離形報故無別處遍在欲色二界之中但隨欲色二界衆生成就四空無色業者隨大乘說有色也其二十八重者謂須彌山根從地上升去地四千由旬繞山縱廣一萬由旬是堅

手天於中止住復上一倍繞山八千由旬是彼持華
鬘天於中止住復上一倍繞山四千由旬是彼常放逸
天於中止住復上一倍繞山四千由旬是彼日月星宿
天於中止住復上一倍繞山四千由旬是彼四天王天
於中止住其中由有七種金是四天王城聚落悉在其中復上升四萬由旬至

須彌山頂縱廣四萬由旬其中有喜見城縱廣一萬由
旬面別有其千門三十三天於中止住即從此山升虛
空四萬由旬有處如雲七寶所成其猶大地是炎摩天

於中止住復上一倍有地如雲七寶所成是兜率陀天
復上一倍有地如雲七寶所成是化樂天復上一倍有
地如雲七寶所成是化自在天如是乃至色界究竟天
皆悉有地如雲七寶所成相去皆倍不煩具說依順正
理論云三十三天迷盧山頂其頂四面各二十千若據
周迴數成八萬有餘師說面各八十千與下際四邊其
量無別山頂四角各有一峰其高廣量各有五百有藥
叉神名金剛手於中止住守護諸天於山頂中有宮名

善見面二十半周萬踰繕那金城量高一踰繕那半其
地平坦亦真金所成俱用百一祿寶嚴飾地觸柔輒如
妬羅綿於踐躡時隨足高下是天帝釋所都大城城有
千門嚴飾壯麗門有五百青衣藥叉勇健端嚴長一踰
繕那量各嚴鎧仗防守城門於其城中有殊勝殿種種
妙寶具足莊嚴映蔽天宮故名殊勝面二百五十踰繕
那周千踰繕那是謂城中諸可愛事城外四面四苑莊
嚴是彼諸天共遊戲處一衆車苑謂此苑中隨天福力

種種車現二麁惡苑天欲戰時隨其所須甲仗等現三襍
林苑諸天入中所玩皆同俱生勝喜四喜林院極妙欲
塵襍類俱臻歷觀無厭如是四苑形皆異方方周千踰
繕那量居各有一如意池池面各五十踰繕那量各功
德水彌滿其中隨欲四苑花鳥香林莊飾業果差別難
可思議天福城外西南角有大善法堂三十三天時集
辯論制伏阿素洛等如法不如法事起世經云佛告比
丘以何因緣諸天會處名善法堂三十三天集會坐時

於中唯論微細善語深義稱量觀察皆是世間諸勝要法真寔正理是以諸天稱為善法堂又何因緣名波婁

沙迦苑

隋言
麤溢

三十三天王已入坐於賢及善賢二石之

上唯論世間麤惡不善戲謔之語是故稱波婁沙迦又

何因緣名禰色車苑三十三天王已坐於禰色善禰

色二石之上唯論世間種種禰色相語言是故稱為禰

色車苑又何因緣名禰亂苑三十三天常以月八日十

四日十五日放其宮內一切采女入此園中令與三十

三天衆合雜嬉戲不生障隔恣其歡娛愛天五欲具足
功德遊行愛樂是故諸天共稱此園為禰亂苑又何因
緣彼天有園名為歡喜三十三天王入其中已坐於歡喜
善歡喜二石之上心愛歡喜復愛極樂是故諸天共稱
彼園以為歡喜又何因緣名波利夜怛邏拘毗陀羅樹
下有天子住名曰末多日夜常以彼天種種五欲功德
具足和合遊戲愛樂是故諸天遂稱彼樹以為波利夜
怛邏拘毗陀羅樹

忉利天善見城周圍四萬十千由旬純金為城城圍繞
高十由旬城上埤堦高半由旬門高二由旬其外重門
高一由旬半十十由旬有一一門城之四面為千門樓
是諸城門衆寶所成種種摩尼之所嚴飾於大城四分
之一中央金城帝釋住處十二由旬有二門四面四百
九十九門復有一小門凡五百門是城形相亦衛四兵
柵塹榭池襍林宮殿作倡伎樂及諸外戲種種寶藏不
可具述是城中央寶樓重閣名皮禪延多樓長五百由

句廣二百五十由旬周圍一千五百由旬其間四邊却
敵寶樓東邊二十六所三面各二十五所凡一百一所
一一却敵方二由旬周圍八由旬其却敵上復有寶樓
高半由旬以為觀望一一却敵有七女天一一女天有
七采女樓閣之內有萬七百房室一一房室有七天女
一一天女采女亦七其天女者並是帝釋正妃其外却
敵及內諸房各四億九萬四千九百正妃三十四億六
萬四千三百采女妃及采女合三十九萬億五萬九千

二百皮禪延多重閣最上當中央圍室廣三十由旬周
圍九十由旬高四十五由旬是帝釋所住之處並是琉
璃所成衆寶所填

問曰諸天僕乘云何答曰如經說云如欲界六天有僕
乘僕謂僕從乘謂騎乘以六欲天皆有君臣妻妾尊卑
上下卑必從尊下必隨上乘者以六欲天皆有裸類畜
生諸天欲遊隨意乘之或乘象馬或乘孔雀或乘諸龍
若依婆沙論說忉利天已下具有象馬鳬雁鴛鴦孔雀

龍等自炎摩天已上悉無象馬四足衆生惟有教放逸
鳥寔語鳥赤水鳥等訶責諸天誠不放逸問曰若無象
馬四足衆生彼天欲遊何所乘耶答曰即如論說還自
釋言雖無象馬諸天欲出以福力故即有象馬隨心化
起任意所乘乘竟化滅此教放逸鳥等遍在六欲天皆
悉有之常與諸天為師訶責放逸不唯炎摩已上偏獨
有也問曰此鳥既是畜生何得與天為師答曰如正法
念經說此鳥本為人時於三天下教化之師諸天本是

所化衆生由信愛化故布施持戒今得生天其鳥本為
師時名為利故破戒其心不寔今作天鳥然由教化徵
善力故今得生天由本化師故與諸天為師若見諸天
放逸即來訶責諸天見聞各生慚愧改不放逸

並上

三界之外次四民天所謂東華南離西靈北貢行仁者
生東華宮行禮者生南離宮行義者生西靈宮行德者
生北貢宮言三界之內大劫交時有四行者堪為種民
王母迎之登上四天為下民種也

四見論

東方八天太皇黃曾天帝鬱繼玉明太明王完天帝須
阿那田清明何童天帝元育齊景元胎平育天帝劉度
內鮮元明文舉天帝醜法輪上明七曜摩夷天帝恬憎
延虛無越衡天帝正定光太極濛翳天帝曲育九昌南
方八天赤明和陽天帝理禁上真元明恭華天帝空謠
醜音曜明宗飄天帝重光明竺落皇笏天帝摩夷妙辯
虛明堂曜天帝阿那婁生觀明端靖天帝鬱密羅千元
明恭慶天帝龍羅菩提太煥極瑤天帝宛黎無延西方

八天元載孔昇天帝開真定光太安皇崖天帝婆娑阿
貪顯定極風天帝招真童始皇孝芒天帝薩維婁王太
皇翁重浮容天帝閔巴狂無思江由天帝明梵光上揲
阮樂天帝勃勃監無極曇誓天帝飄弩穹隆北方八天
皓庭霄度天帝慧覺昏淵通元洞天帝梵行觀生太文
翰寵妙成天帝那育醜瑛太素秀樂禁上天帝龍羅覺
長太虛無上常容天帝總監鬼神太釋王隆騰勝天帝
眇眇行元龍變梵度天帝運上元元太極平育賈奕天

帝大擇法門

度人經

劉向說天裂陽不足地動陰有餘

晉書

懿王元年天再旦于鄭

汲冢紀年

成帝建始三年七月夜有青黃白氣長十餘丈光明照

地或曰天裂或曰天劒

古今注

王摛史學博聞永明中天忽黃色照地衆莫能解摛云

是榮光世祖大悅用為永陽太守

齊書

沙門曇鸞雁門人家近五臺山神迹靈異鸞因患氣疾

周行醫療行至汾水秦陵故墟入城東門仰望青雲忽覓
天門調開六欲階位上下重復歷然齊覩由斯疾愈求
覓仙方冀益長壽及屆山所接對欣然便以仙方十卷

用酬來意

神僧傳

星官之書自黃帝始至高陽氏乃使南正重司天文耀

鉤曰唐堯即位羲和立渾儀

後漢志

顓頊造渾儀黃帝為蓋天皆以天象蓋也

劉氏歷正

近世有四術方天興於王充昕天起於姚信穹天開於

虞曷皆臆斷浮說惟渾天證驗無疑

賀道養渾天記

古人言形者有三一日渾天二日蓋天三日宣夜

蓋天即周

髀也

渾天之作由來尚矣考之在天信而有徵舊說天地之體狀如鷄卵天包地外猶殼之黃渾天言其形體渾渾如也周天三百六十五度五百八十九分度之百四十五東西南北展轉周規半覆地上半在地下故二十八宿半見半隱以儀准之其見常一百八十三度有奇是

以知其半覆地上半在地下也黃赤二道見與交錯一
間相去二十七度以兩儀准之俱三百六十五度有赤
道見者常百八十二度半強又南北考之天見者亦一
百八十二度半強是天之體圓如彈丸北極出地三十
六度是知南極入地亦三十六度而兩相去百八十半
強也

王蕃渾
天說

虞喜曰宣明也夜幽也幽明之數其術魚之故云宣夜

書正
義

宣夜之書云惟漢祕書郎郗萌記先師相傳云天無質
仰而瞻之高遠無極眼瞖精絕故蒼蒼然也譬之旁望
遠道之黃山而皆青俯察千仞之深谷而窈黑夫青非
真色而黑非有體也日月衆生自然浮生虛空之中其
行其止皆須氣焉是以七曜或逝或住或順或逆伏見
無常進退不同由乎無所根繫故各異也

晉書

漢太初中洛下黃閤鮮于妄人耿壽昌等造員儀以考
厯度後至和帝時賈逵繼作又加黃道至順帝時張衡

又制渾象具內外規南北極黃赤道列二十四氣二十
八宿中外星官及日月五緯以漏水轉之於殿上室內
星中出沒與天相應因其闕戾又轉瑞輪莫英於階下
隨月虛盈依歷開落其後陸續亦造混象至吳時中常
侍廬江王蕃善數術傳劉洪乾象歷依其法而制渾儀
晉書○劉曜時南陽孔定製銅
儀太史令晁崇斛蘭嘗為鐵儀

揚子雲好天文問之於黃閎作渾天老工曰我少能作
其事但隨尺寸法度殊不曉達其意我稍稍益愈到今

七十乃甫適知己又老且死矣今我兒子受學作之亦

當復年如我乃曉知己

桓子
新論

吳有葛衡字思真明達天官能為機巧作渾天使地居
於中以機動之天轉而地止以上應晷度

晉陽
秋

成帝咸康中會稽虞喜因宣夜之說作安天論以為天
高窮於無窮地深測於不測天確乎在上有常安之形
地魄焉在下有居靜之體常相覆冒方則俱方員則俱
員無方員不同之義也其光曜布列各自運行猶江海

之有潮汐萬品之有行藏也葛洪聞而譏之曰苟辰宿不麗於天天為無用便可言無何必復云有之而不動乎由此而談雅川可謂知言之選也虞喜族祖河間相聳又立穹天論云天形穹隆如雞子幕其際周接四海之表浮於元氣之上譬如覆奩以抑水而不沒者氣充其中故也日繞辰極沒西而還東不出入地中天之有極猶蓋之有斗也天北下於地三十度極之傾在地卯酉之北亦三十度人在卯酉之南十餘萬里故斗極之

下不為地中當對天地卯酉之位耳日行黃道繞極極
北去黃道百一十五度南去黃道六十七度二至之所
舍以為長短也吳太常姚信造昕天論云人為靈虫形
最似天今人頤前多臨胸而項不能覆背近取諸身故
知天之體南低入地北則偏高又冬至極低而天運近
南故日去人遠而斗去人近北天氣至故冰寒也夏至
極起而天運近北而斗去人遠日去人近南天氣至故
蒸熱也極之立時日行地中淺故夜短天去地高故晝

長也極之低時日行地中深故夜長天去地下淺故晝短也自虞喜虞聿姚信皆好奇徇異之說非極數談天者也

晉書以下日月以

孔子曰日者天之明月者地之理月上屬為使婦從夫

放月紀

孝經援神契

王曰余不知九星之光周公旦曰九星星辰日月四時

歲是謂九星九光

周書

日猶火月猶水火則施光水則含影月光生於日所照

魄生於日所蔽當日則光盈近日則明盡

周髀

日者寸也紀刻而成晷也月者尺也紀度而成數也

范子

然計

日一南而萬物生日一北而萬物成地坎而天嚴月遙

而日湛五行迭王四時不俱壯

太玄經

地將震而樞星直井無景則日陰食元首寬則望舒朏

侯王肅則月匿影

後漢書

日晝行千里夜行千里然則日行舒緩與麒麟之步相

似類也月行十三度十度二萬里三度六千里與晨見之飛相似類也天行三百六十五度積凡九十三萬里也行甚疾無以驗當與陶鈞之運弩天之流相類似乎

論衡

孝經援神契曰天地至貴精不兩明注天精為日地精為月

五月午日日月會於鶉首八月酉日日月會於壽星

太衍

星分圖

常陽之山日月所入

山海經

大荒之中有山名曰鞠陵日月所出

大荒中有山名曰明星日月所出

大荒中有方山上有青松名曰拒格之松日月所出入

並上

日之臨照四十萬六千里月照四十五萬里

說書

瀛州有金鑾之觀飾以衆環直上千雲中有青瑤瓦覆以雲紈之素刻碧玉為倒龍之狀態火精為日刻黑玉為鳥以水晶為月青瑤為蟾兔於地下為闕楹以測昏

明不虧弦望時時有香風冷然而至張袖受之歷年不

歇拾遺

記

佛告諸比丘日天宮殿縱廣正等五十由旬上下亦爾
以二種物成其宮殿正方如宅遙看似圓何等為二所
謂金及玻瓈一面兩分皆是天金成清淨光明一面一
分是天玻瓈成清淨光明有五種風吹轉而行何等為
五一名為持二名為住三名隨順轉四名波羅訶迦五
名將行彼日天宮之前別有無量諸天而行時各常受

樂皆名牢行

阿含經云日天宮牆地薄如華葩為五風所持地

又日宮殿中有

閻浮檀金以為妙輦輦高十六由旬方八由旬莊嚴殊

勝天子及眷屬在彼輦中以天五欲具足受樂日天子

身壽五百歲子孫相承皆於彼治宮殿住持滿足一劫

日天身光出照於輦輦有光明復照宮殿光明相接出

已照耀遍四大州及諸世間日天身輦及宮殿有一千

光明五百光明傍行而照五百光明向下而照日天宮

殿常行不息六月北行於一日中漸移北向六拘盧舍

依雜寶經
有五里

未曾暫時離於日道六月南行亦一日中漸

移南向六拘盧舍不差日道日天宮殿六月行時月天

宮殿十五日中亦行爾許佛告比丘月天子宮殿縱廣

正等四十九由旬四面垣牆七寶所成月天宮殿純以

天銀天青琉璃兩相間錯二分天銀清淨無垢光甚明

曜餘之一分天青琉璃亦甚清淨表裏映徹光明遠照

亦為五風攝持而行

五風如前

月天宮依空而行亦有無量

諸天宮殿引前而行恒受快樂於此月殿亦有五輦青

琉璃成舉高十六由旬廣八由旬天子身與諸天女在
此輦中以天種種五欲功德和合愛樂隨意而行彼月
天子身壽五百歲子孫相承皆於彼治然其宮殿住於
一劫彼月天子身分光明照彼青輦其輦光明照月宮
殿宮殿光照四大州彼月天子有五百光向下而照有
五百光傍行而照是故月天名千光明亦復名為含冷
光明又何因緣月天宮殿漸漸現耶佛答此月三因緣
一背相轉二青身諸天形服瓔珞一切悉青常半月中

隱覆其宮以隱覆故月漸而現三從日天宮殿有六十
光明一時流出障彼月輪以是因緣漸漸而現復何因緣
是月宮殿圓淨滿足亦三因緣故令如是一爾時月天
宮殿面相轉出二青色諸天一切皆青當半月中隱於
十五日時形最圓滿光明熾盛譬如於多油中然火熾
炬諸小燈明皆悉隱翳如是月宮十五日時能覆諸光
三復次日宮殿六十光明一時流出障月輪者此月宮
殿十五日時圓滿具足於一切處皆離翳障是時日光

不能隱覆復何因緣月天宮殿於黑月分第十五日一切不現此月宮殿於黑月分十五日最近日宮由彼日光所覆翳故一切不現復何因緣名為月耶此月宮殿於黑月分一日已去乃至月盡光明威德漸漸減少以此因緣名之為月

西方以月為黑白月初一日至十五日名為白月十六日已後至月盡名

為黑月此方通攝黑白合為一月也

復何因緣月宮殿中有諸影現此大

州中有閻浮樹因此樹故名為閻浮州其樹高大影現

月輪

起世經

由大海中有魚鼈等影現月輪故其內有黑相現

論瑜伽

陽精為日陰精為月分日月之精為星辰網者連星也紀
者綴星也星形正圓如丸不應似貫珠穿度又不容作
鈴鼻相綴理宜如破箭竿還相合以成體天地初成無
子舉翅飛上乃在華蓋之下左有北辰右有北斗星辰
稍脩東南西北稍正星辰共以真道要養萬二千物下
及六畜糞土草木皆被服其祕道要德而生長焉

玄門寶海

經

日一名鬱儀月一名結璘

太洞經

日中赤帝上皇真君諱將車梁字高騫爽月中黃氣上

皇神母諱曜道支字玉薈條日中青帝諱圓常無字昭

龍輜衣青玉錦帔蒼華飛羽羣建翠芙蓉晨冠日中赤

帝諱丹虛峙字綠虹映衣絳玉錦帔丹華飛羽羣建丹

符靈明冠日中白帝諱浩鬱將字迴金霞衣素玉錦帔

白羽飛華羣建浩靈芙蓉冠日中黑帝諱澄增停字玄

綠炎衣玄玉錦帔黑羽飛華羣建玄芙蓉冠日中黃帝

諱壽逸阜字颺暉像衣黃玉錦帔黃羽飛華帔建芙蓉
紫冠月中夫人寃精內神名暖蕭臺標月中青帝夫人諱
隱娥珠字芬艷嬰衣青華瓊錦帔翠龍鳳文飛羽帔月
中赤帝夫人諱逸寥無字婉筵靈衣丹葉玉錦帔朱華
鳳落飛羽帔月中白帝夫人諱靈素蘭字鬱連華衣白
珠四出龍錦帔素羽鸞章飛華帔月中黑帝夫人諱結
翅字淳厲金衣元琅九道雲錦帔黑羽龍文飛華帔月
中黃帝夫人諱青營襟字炁定容衣黃雲山文錦帔綠

羽鳳華繡帟

雲笈
七籤

蘇利耶此云日神蘇摩此云月神

大孔
雀經

日月者天地之司徒司空也日姓張名表字長史月姓

文名申字子光

老子歷
藏中經

日中有藥淵月中有瓊池

僊
經

日有九芒月有十芒方諸宮有服日月芒法

真
誥

日陽之精德之長也縱廣二千三十里金物水精暈於
內流光照於外其中有城郭人民七寶浴池池生青黃

赤白蓮花人長二丈四尺衣朱衣之服其花同衰同盛
日行有五風故制御日月星宿遊行皆風梵其綱金門
之上日之通門也金門之內有金精冶鍊之地在西關
左之分故立春之節日更鍊魄於金門之內耀其光於
金門之外四十五日乃止順行至洞陽宮吐金冶之精
以灌於東井之中沐浴於晨暉收八素之氣歸廣寒之
宮也月暉之圍縱廣二千九百里白銀琉璃水精映其
內城郭人民與日宮同有七寶浴池八騫之林生於內

人長一丈六尺衣青色之衣常以一日至十六日採白
銀琉璃鍊於炎光之治故月度盈則光明比十七日至
二十九日於騫林樹下採三風之華拂日月之光也秋
分之日月宿東井之地土廣靈之堂乃沐浴於東井之
池以鍊日寃明八朗之芒受陽精日暉吐黃氣於玉池
諸天人悉採玉樹之華以拂日月之光月以黃氣灌天
人之容故秋分是天人會月之道也

黃氣陽
精經

青牛道士口訣暮卧存日在額上月在臍上辟千鬼萬

邪致玉女來降萬禍伏走祕驗

服日月之精華者欲得常食竹筍者日華之胎也一名
大明又欲常食鴻脯者月胎之羽鳥也一名月鷺欲服
日月常食此物氣感運之太虛真人曰鴻者羽族之總
名也其鵠雁鷺鷥鷗皆曰鴻鷺也古歌曰鴻鷺十年鳥為
有致天真五帝銜月華列坐空中賓

此古之漁父歌也

日出於暘谷浴於咸池拂於扶桑是謂晨明登於扶桑
爰始將行是謂朏明至於曲阿是謂旦明至於曾泉是

謂蚤食至於桑野是謂晏食至於衡陽是謂禺中至於
昆吾是謂正中至於鳥次是謂小還至於悲谷是謂晡
時至於女紀是謂大還至於淵虞是謂高春至於連石
是謂下春至於悲泉爰止其女爰息其馬是謂縣車至
於虞淵是謂黃昏至於蒙谷是謂定昏日入於虞淵之
汜曙於蒙谷之浦行九州七舍有五億萬七千三百九

里

淮南子

儒者或以日出入為近日中為遠者見日出時大日中

時小也或以日中為近日出入為遠者見日中時溫日出入時寒也如實論之日中近而日出入遠何以驗之以植竿於屋下夫屋高三丈竿於屋棟之下正而樹之上扣棟下抵地是以屋棟去地三丈如旁邪倚之則竿木旁跌不得扣棟是謂去地過三丈也日中時日正在天上猶竿之正樹去地三丈也日出入邪在人旁猶竿之旁跌去地過三丈也夫如是日中為近出入為遠可知明矣然則日中時日小出入時大者日中光明故小

衡論

其出入時光暗故大猶晝日察火光小夜察火光大也

儒者說日及工技之家皆以日為一禹貢山海經言日
有十在海外東方有湯谷上有扶桑十日沐浴水中有
大水九日居下枝一日居上枝淮南書又言燭十日堯
時十日並出萬物焦枯世俗又名甲乙為日甲至癸凡
十日日之有十猶星之有五也通人談士歸於難知不
肯辯明是以文二傳而不定世兩言而無主誠實論之

且無十焉何以驗之夫日猶月也日而有十月有十二
乎星有五五星之精金木水火土各異光色如日有十
其氣必異今觀日光無有異察其小大前後若一如審
氣異光色宜殊如誠同氣宜合為一無為十也驗日陽
燧火從天來日者大火也察火在地一氣也地無十火
天安得十日然則所謂十日者殆更自有他物光質如
日之狀居湯谷中水時緣據扶桑禹益見之則紀十日
數家度日之光數日之質刺徑千里假令日出是扶桑

日上之日扶桑木宜覆萬里乃能受之何則一日徑千里十日宜萬里也天之去人萬里餘也仰察之日光眩耀火光盛明不能堪也使日出是扶桑木上之日禹益見之不能知其為日也何則仰察一日目猶眩耀况察十日乎由此言之禹益所見意似日非日也天地之間物氣相類其寔非者多海外西南有珠樹焉察之是珠然非魚中之珠也夫十日之日猶珠樹之珠也珠樹似珠非真珠十日似日非實日也淮南見山海經則虛言

真人燭十日妄紀堯時十日並出且日火也湯谷水也
水火相賊則十日浴於湯谷當滅敗焉火燃木扶桑木
也十日處其上宜焦枯焉今浴湯谷而光不滅登扶桑
而枝不焦不枯與今日出同不驗於五行故知十日非
真日也 上

冬至晷長丈三尺

鄭玄注曰晷者所立八尺表陰也丈三尺長之極

春分晷長

七尺三寸四分夏至晷長尺有四寸八分秋分晷長二

寸四分

易通卦驗

陽數起于一成于三故日中有三足烏

春秋元命苞

日者實也形體光實人君之象

禮統

君乘木而王其政昇平則日黃中而青暈乘火而王則

黃中而玄暈

禮斗威儀

政太平則日五色政公平則日黃中而赤暈政和平則

日黃中而黑暈政象平則日黃中而白暈政升平則日

黃中而青暈上

日光曰景

星月之光通謂之景

日影曰晷出氣曰暝日初出曰旭

日昃曰晞日溫曰煦在午曰亭午在未曰昃日晚曰肝

日西落光返照於東謂之反景照在下曰倒景

纂要

日中三足鳥見者其所居分野有白衣會

黃帝占書

日中五帝鬼精內神名珠景赤童

雲笈七籤

日再中烏連嬉仁聖出握知時

易解終備

羣臣恣則日黃無光羣臣爭則日裂人主排斥則日夜

出

春秋感精符

黑帝亡二日並出

尚書考靈曜

凡日無光則日烏不見日烏不見則飛鳥隱竄

物類相感志

日者衆陽之精內明玄黃五色無主以象人君精精似青翼翼似黑炫炫似赤縞縞似白煌煌似黃光照無主不可以一色名也

易傳

祭河婁國土人無有日月之光菩薩往造日城

造天地經

東華方諸宮高晨師玉保仙王曰青童東華者仙真之州也在始暉之間高晨玉保王所治也東華真人呼日為紫曜明或曰圓珠青童君乘雕玉之輶御圓珠之

氣登雲波之山入東華之堂

雲笈七籤

皇初紫元君曰皇初紫元之天常有暉暉之光鬱鬱如薄霧焉乃九日之所出有如一日之照耳六淵者乃元君之宮名寒童者山名也故曰登寒童之嶽會六淵之中矣

上

玄門輪及太洞經云九真人呼日為濯曜羅三天真人呼月為圓光蔚上清真人呼日為九曜生泰清天中仙人呼日為大明太極天中呼日為圓明東華真人呼

日為紫曜明亦名圓珠亦謂始暉亦謂大明

並上。又真誥云方

諸下真人呼日為圓曜明

君應陽君臣和得道度則日含王字

春秋緯

高上太素君曰高上皇人常宴紫霄之上玉根者玉清

天中山名也乃五老上真之所治太素真人拂日月之

光于帝一之前太素天中呼曰為眇景也玉門蘭室也

並是上清宮中門戶名也月中樹名騫樹一名藥王凡

有八樹在月中也得食其葉者為玉仙玉仙之身洞徹

如水精琉璃焉

雲笈七籤

皇上四老道中君曰皇上四老真人在日中無影呼日名為九曜生常乘明玉之輪轉宴於日中也廣霞者玉清天中山名乃九日之所出矣日帝之所司也

太陽九氣玉賢元君曰太陽九氣者變化三晨之上策駕紫輶於微元之下微元者日中之神名曰玉賢天中呼日為微元也

並上

炎帝築圓丘以祀朝日飾瑤階以揖夜光

拾遺記

三苗之時三月不見日

少昊邑於窮桑日五色互照

尸子

帝堯修壇河洛仲月辛日禮脩至於日禋榮光出河龍

馬卸甲變綠色臨壇吐甲圖

出尚書中候宋均曰禋側也

伊摯將應湯命夢乘船過日月之傍

太平御覽

周文王夢日月著其身

帝王世紀

景公病水卧十數日夜夢與二日鬪不勝晏子朝公曰

夕者夢與二日鬪而寡人不勝我其死乎晏子對曰請

召占夢者出於閨使人以車迎占夢者至曰曷為見召
晏子曰夜者公夢二日與公鬪不勝公曰寡人死乎故
請君占夢是所為也占夢者曰請反其書晏子曰毋反
書公所病者陰也日者陽也一陰不勝二陽故病將已
以是對占夢者入公曰寡人夢與二日鬪而不勝寡人
死乎占夢者對曰公之所病陰也日者陽也一陰不勝
二陽公病將已居三日公病大愈公且賜占夢者占夢
者曰此非臣之力晏子教臣也公召晏子且賜之晏子

曰占夢以占之言對故有益也使臣言之則不信矣此
占夢之力也臣無功焉公兩賜之曰以晏子不奪人之
功以占夢者不蔽人之能

晏子

晉侯問於士文伯曰三月朔日有蝕之寡人學惛焉詩
所謂彼日而蝕于何不臧者何也對曰不善政之謂也
國無政不用善則自取譴於日月之災故不可不慎也
政有三而已一日因民二曰擇人三曰從時

說苑

專諸之刺王僚也彗星襲月聶政之刺韓傀也白虹貫

日要離之刺慶忌也蒼鷹擊於殿上

戰國策

張重字仲篤明帝舉孝廉帝曰何郡小吏答曰臣日南吏帝曰日南郡人應向北看日答曰臣聞雁門不見壘雁為門金城郡不見積金為郡臣雖居日南未曾向北

看日

後漢書

建武元年三日並出

晉陽

程立夢登太山捧日立以白太祖太祖遂加日於立上

因改名昱

魏志

惠帝時日中有若飛燕者數日乃消王隱以為愍懷廢

死之徵

晉書

永寧元年九月甲申日中有黑子京房易占黑者陰也

臣不掩君惡今下見百姓惡君則有此變又曰臣有蔽

主明者

上

高祖夢天開數丈有一人朱衣捧日令帝張口納之及

覺猶熱後二百日為帝

陳書

五帝日君遂與裴君驂乘飛龍之車東到日窟之天東

蒙長丘大桑之宮八極之城登明真之臺坐希林之殿
授裴君以揮灑之章九有之符食青精日飴飲靈碧元腴
於是與五帝日君日日而遊此所謂弄日之道也

雲笈
七籤

舊說曰日有五蝕謂起上下左右中央是也漢尚書令
黃香曰日蝕皆從西月蝕皆從東無上下中央者春秋
魯桓三年日蝕貫中上下竟黑疑者以為日月正等月
何得小而見日中鄭玄云月正掩日日光從四邊出故
言從中起也

南齊
書

凡救日食皆著赤幘以助陽也

決疑要注

難者曰大旱雩祭而請雨大水鳴鼓而攻社或請焉或怒焉者何曰大旱者陽滅陰也陽滅陰者尊壓卑也雖太甚拜請之而已無敢有加也大水者陰滅陽也陰滅陽者卑勝尊也日食亦然皆下犯上以賤傷貴逆節也故鳴鼓而攻之朱絲枹之為其不義也

董子

董仲舒救日食祝曰昭昭大明纖滅無光奈何以陰侵

陽以卑凌尊

周官大祝注

天子救日置五麾陳五兵五鼓諸侯置三麾陳三兵三鼓大夫擊楬凡有聲皆陽事也以厭陰氣穀梁傳

角尾交日月食救之者謂夫人擊鏡傳人擊杖庶人之

妻楔搔白虎通

何汶字景由為謁者持赤幘同僚問之曰日當食晡時

果食益部耆舊傳

月天夜明聖人以辯昏象陰形月聖人以命相代政天月淫聖人以機密大臣代政山月升騰聖人以命相統

治川月東浮聖人以恩及命婦雲月藏宮聖人以慎內

政氣月冥陰聖人以慎羣小月氣夜圓聖人以定方象

墳三

月三日成魄八日成光蟾蜍體就光魄時萌

詩推度災

政太平則月多耀政公平則赤明政和平則黑明政象

平則白明政升平則青明

禮斗威儀

人君乘土而王其政平則月圓而多暈上

大荒之中有山名曰日月山天樞也有女子方澄浴月

帝俊之妻常羲生月十有二此始浴之

山海經

帝淫佚則奎有角月有足

龍魚河圖

若月三珥者大臣有喜若有冠而復暈者天下有喜

軍國

占候

諸侯謀叛則月生小牙后族專政則日月並照

春秋考異郵

蟾蜍去月天下大亂

河圖

樂彥引老子道德經云月中仙人宋無忌按白澤圖火

之精曰宋無忌蓋其人火僊也

史卦禪書注

金華和丹其光上與日月相連丹金為盤枕以承月得

神精如方諸

太平御覽

羿請無死之藥於西王母嫦娥竊之以奔月將往枚筮之於有黃有黃占之曰吉翩翩歸妹獨將西行逢天晦芒母恐母驚後且大昌嫦娥遂託身於月是為蟾蜍

搜神記

嫦娥奔月之後羿晝夜思惟成疾正月十四夜忽有童子詣宮求見曰臣夫人之使也夫人知君懷思無從得降明日乃月圓之夜君宜用米粉作丸團團如月置室西北方呼夫人之名三夕可降耳如期果降復為夫嬪

如初今言月中有嫦娥大謬蓋月中自有主者乃結璘

非嫦娥也

廣記○一云嫦娥字純狐

闕澤年十三夢見名字炳然在月中

會稽先賢傳

尹思者字少龍安定人也晉元康五年正月十五夜坐

屋中遣兒視月中有異物否兒曰今年當大水月中有

一人披簑帶劍思自視之曰將有亂卒至兒曰何以知

之曰月中人乃帶劍仗矛當大亂三十年後小清耳後

果如其言

真語

安帝隆安五年三月甲子月生齒占曰月生齒天子有
賊臣羣下自相殘桓玄篡逆之徵也

晉書

北齊釋曇遷常尋惟識論遂感心疾專憑三寶不以醫
術纏情夜夢月落入懷乃擘而食之脆如冰片甚訝香
美覺罷所苦因其勝助食月成德遂私改鄉名為月德

也

續高僧傳

五帝月夫人遂與裴君共乘飛龍之車西到六嶺之門
八絡之丘協晨之宮八景之城登七靈之臺至太和之

殿授裴君流星夜光之章十朋之符食黃琬紫精之粘
飲月華雲膏於是與五夫人夕夕共遊此所謂奔月之

道矣

雲笈
七籤

廣博物志卷一

欽定四庫全書

廣博物志卷二

明 董斯張 撰

天道二星

夫占變之道二而已矣二者陰陽之數也易曰一陰一陽之謂道是故發於一成於二備於三周於四行於五懸象著明莫大於日月察變之動莫著於五星天之五星運氣於五行其初猶發於陰陽而化極萬一千五百

二十五星之所犯各以金木水火土為占春夏秋冬伏見有時失其常離其時則為變異得其時居其常是謂

吉祥

說苑

星之為言精也陽之榮也陽精為日日分為星故其字

日生為星

春秋說題辭

衆星布列體生於地精成於天列居錯峙各有攸屬在野象物在朝象官在人象神其以神差有五列焉是為三十五名一居中央謂之北斗四布於方各七為二十

八舍日月運行歷示吉凶五緯躔次用告禍福中外之
官常明者百有二十四可名者二百二十為星二千五
百微星之數蓋萬一千五百二十庶物蠢蠢咸得繫命
不然何得總而理諸靈憲

常星猶公卿也衆星猶萬民也列星正則衆星齊常星

亂則衆星墜矣

鹽鐵論

玉鈐云主命原由人之吉凶脩短於結胎受氣之日皆
上得列宿之精其值聖宿則聖值賢宿則賢值文宿則

文值武宿則武值貴宿則貴值富宿則富值賤宿則賤
值貧宿則貧值壽宿則壽值僊宿則僊

抱朴子

太微者太乙之庭也紫宮者太乙之居也軒轅者帝妃
之舍也咸池者水魚之園也天阿者羣神之闕也

淮南子

大星一由旬小星二百步樓炭經云大星圍七百里中
星四百八十里小星二十里星是諸天宮宅瑜伽論云諸
星宿中其星大者十八拘盧舍其中者十拘盧舍其小

者四拘盧舍

法苑珠林

五星反羽其下之國不可久處反羽光芒上天下小狀

如反羽

宋書

歲星其國齊其位東方蒼帝之子人主之象也其色明而內寔暗天下安寧夫歲星所居國人主有福不可加以兵歲星一曰攝提一曰重華一曰應星一曰經星一曰修仁歲星動人主怒無光仁道失歲星順行仁德加也歲星農官也主五穀春不勸農則歲星盈縮所在之

國不可以罰小則民多病大則喜

天官星占

太白謂之太囂

廣雅

太白位在西方白帝之子天將之象也一名天相一名

太正一名大臣一名大皓一名明星

天官星占

太白暉芒雞必夜鳴火精光盛馬必晨驚

劉子

熒惑主大鴻臚主死喪主司空又為司馬主楚吳越以

南又司天下羣臣之過司驕奢亡亂妖孽主歲成敗

廣雅

熒惑主夏位在南方赤帝之子方伯之象也為天候主

歲成敗司察妖孽所在有兵為亂為賊為疾為喪為饑

為兵

天官星占

孔子曰火土不可握熒惑斑變不可息志帝應其修無

極此言熒惑火精尤史家所宜察也

風俗通

填星者黃帝之子女主之象也一名地候

廣雅

鎮星主德女主之象也所居國有德不可以兵加也

天官

星占

填星墜海水決黃星騁海水躍

晉書

辰星北方之位黑帝之子宰相之祥也一名安調一名

熊星一名鈎星一名伺晨主德常行四仲當出不出天

下旱色黃五穀熟色白中謀泄色青大臣憂

天官星占

辰星一名熒星一名伺星

廣雅

凡五星盈縮失位其精降於地為人歲星降為貴臣熒

惑降為童兒歌謠嬉戲填星降為老人婦女太白降為

壯夫處於林麓辰星降為婦人吉凶之應隨其象告

晉書

五星者是日月之靈根天胎之五臟天地賴以綜氣日

月繫之而明東方歲星真皇君姓碧空名澄瀾字清凝

夫人姓涵常名寶容字飛靈南方熒惑真皇君姓渙空名維渟字散融夫人姓陽常名華凝字元羅太白真皇君姓皓空名德標夫人姓颺英字靈恩辰星真皇君姓

闕

名肇咥字積原夫人名元華字龍娥鎮星真皇君名藏睦字耽延夫人名空瑤字飛賢二十八宿為籬落也織女水官星能致神芝食之壽與天地無極傳舍水官星主天符南戒星同北戒水官星旦為馬晝為鹿暮為麋天市星天之倉曹神能致明月珠旦為犬晝為鬼暮

為貉平門土官星能致神女倡樂旦為畊牛晝為豕暮
為螭螭玄冥星姓冥樞名定宣覺字法開度真名執天
之遊擊也主伐逆上總九天鬼神中領北帝三官下監
萬兆穀土星能致飛鳥來朱雀旦為雞晝為烏暮為鵲
積水星能致四方萬物恣其所欲坐在立亡狼星能致

天帝君百二十神

雲笈
七籤

春步七星名曰步三綱夏步七星名曰躡六紀秋步七
星名曰行六害冬步七星名曰登六絕

上

北極五星一名天極一名北極其第一星為太子第二
星最明者為帝第三為庶子餘二後宮屬也並在紫微
宮中央故謂之中極其占明大則吉若變動則有憂

大象

列星
圖

上有九辰華君中有九皇夫人魂精魄靈皆元斗之威
神吐煥七曜之光流映九天之門洞朗幽虛無毫不彰
也其星陽芒則為流金火鈴陰芒則為豁落七元皆高
上之靈策元始之威章也能飛尺素之訣隱緯呂之中

列帛華辰之下羊雁禮天以招真則玄光曲照于盟場
九辰下降于靈宇夫人懽悅于寢席元斗記名于隱書
有知此道存之便足以免大劫之會度洪災于甲申也

雲笈
七籤

北斗君字君時一字充北斗神君本江夏人姓伯名大
萬挾萬二十石左右神人姓雷名機字太陰主天下諸
仙人又招搖與玉衡為輪北斗之星精曜九道光暎十
天

東斗主擊君西斗主伐君中斗伏逆君紫微宮內神姓
柳字君明紫微君字露光夫人姓王諱叔華太微星君字
卿元太微內有三皇一曰皇君二曰天皇三曰皇老此
即三元之氣混沌之真在太微總領符命也文昌星神
君字先常天子司命之符也土官星所主能致山內菓
實旦為猿晝為猴暮為鼯鼯璇璣星君字處行鈎陳水
星主之常陳天之虎賁也五車天之五嶽能致甘露麒
麟三台星天之陞官旦為龍晝為蛇暮為魚三神者三

台之靈也上台神君字顯真上台名虛精主金玉中台
神君字章明中台名六淳主祿位中台兩星小濶晉張
華為司空死其星開下台神君字際生下台名曲生主
土田軒轅星天之后妃土官也其神旦為羊晝為蟹暮
為蟹洞明星姓幽昇字幽韻真人星姓歸珩諱妙光字
度元天之司空主五嶽靈仙

北斗第一星中名太上官宮中有帝君變隱逃元內妃
名太乙法恒字幸正扶著黃錦帔丹青飛翬顏雲鬢第

二星名中元宮宮中有帝君保胎化形內嬪名太乙三
竈字羅朱嬰著赤錦帔綠羽飛裙頰雲髻第三星中名
真元宮宮中有帝君六遁七隱上元丹母名太乙虛夷
字仲雙兆著青錦帔繡羽華飛裙頰雲髻第四星中名
紐幽宮宮中有帝君匿景藏光中元妃名太乙七烈
字橫單槃著紫錦帔黃華羽裙頰雲髻第五星中名網
神宮宮中有帝君變體易景斗中太女名太乙鬱書字
疇邱蘭著朱錦帔紫青飛裙頰雲髻第六星中名紀明

宮宮中有帝君隱迹散衆斗中中女名太乙氣精字抱
定陵著朱錦帔青繡飛帔顏雲髻第七星中名闕會宮
宮中有帝君分景萬形斗中少女名太乙都墨字天凡
著朱錦帔青華明羽帔顏雲髻第八星中名帝席宮宮
中有帝君化日月水火斗中高皇左夫人名太乙石啟
珠字落茂華著紫錦帔繡羽飛丹帔顏雲髻第九星中
名上尊宮宮中有帝君化金石山河斗中高皇右夫人
名太乙條字雲育著綠錦帔翠羽華帔顏雲髻

第一天樞星則陽明星之魂神也其星則號元斗宮魁
精元上真皇夫人姓明通諱甕元真名上精頭建飛雲
華顏之髻餘髮散至腰衣紫黃青三色之褕帶九鈴之
綬口恒吐青氣之光

第二天璇星則陰精星之魄神也其星則號元斗宮虛
精上元皇夫人姓元鏡諱鬱勃光真名金歸頭建飛雲
華顏之髻餘髮散至腰衣飛錦羅裙鳳交錦帔帶飛紫
綬口恒吐黑氣之光

第三天璣星則真人星之魄精也其星則號上精宮靈
妃元皇夫人姓常明諱化雲真名流燭頭建霞纓寶冠
衣飛雲明光錦褕帶六山飛晨之綬口恒吐黃氣之精
第四天權星則玄冥星之魄精也其星則號網極宮上
虛神妃華皇夫人姓開生諱運明真名嬰闕頭建七稱
之冠衣緋羅鳳文之褕帶金真玉光口恒吐紫氣之精
第五玉衡星則丹元星之魄靈也其星則號紀明宮北
上金蓋中皇夫人姓元方諱神武真名勃頭建紫霞飛

華之冠衣九色之褕帶神虎玉文口恒吐白氣之光

第六閭陽星則北極星之鬼靈也其星則號紫極宮安
上晨華元皇夫人姓王元諱根華真名冥會頭建玉霞
進賢之冠衣飛青羽褕帶流金火鈴口恒吐綠氣之精
第七搖光星則天關星之鬼太明也其星則號運天宮
玉華靈皇夫人姓度元諱終會真名啓光頭建飛華頽
雲之髻餘髮散至腰衣七色夜光雲錦之褕九色錦帔
九天威靈玉策口恒吐赤氣之精

第八洞明星則輔星之魂精陽明也其星則號空真宮
太明常皇夫人姓幽昇諱無韻真名空變頭建飛雲華
頽之髻餘髮散至腰衣飛羅文襦帶九光之綬口恒吐
青氣之精

第九隱元星則弼星之魂明空靈也其星則號元寶宮
空玄變靈上皇夫人姓冥通諱萬先真名常陽頭建飛
雲七稱玉冠衣青衣錦襦帶九光夜燭口恒吐黑氣之
精

陽明星天之太尉司政主刑上總九天上真中監五嶽
飛仙下領後學真人天地神靈功過輕重莫不隸焉星
圖九百二十里皆琉璃水精中有玉樹青寔金翅之鳥
棲宿其上自生青精玉芝食之一口壽九萬年星有九
門門有四光芒皆燭照九億萬里中上有青城玉樓據
斗真人號曰太上宮青城玉樓九晨君姓上雲號法嬰
容字董洞陽搖天槌頭建九晨玉冠衣青羽飛裳手執
斗中玄圖坐玉樓之中若有元名玉錄當得知九晨君內

諱

陰精星天之上宰主祿位上總天宿下領萬靈及學仙
之人諸學道及兆民宿命祿位莫不隸焉星圖五百五
十里亦皆琉璃水精中有玉樹黑實金翅之所棲自生
玄芝玉飴食之一口得壽五萬年星有五門門有四光
芒燭照九億萬里中上有五色玉樓攀魁真人號曰中
元宮五色玉樓北上晨君姓育嬰諱元上瓮字昌陽文
激明光頭建元精玉冠衣元羽飛裳手執五色羽節坐

玉樓之中若有元名朱臺當得知上晨君內諱

真人星天之司空主神仙上總九天高真中監五嶽靈
仙下領學道之人真仙之流莫不隸焉星圖七百七十
里亦皆琉璃水精中有玉樹黃實金翅之所棲自生黃
精玉芝食之一口得壽三千萬年星有十二門門有四
光芒燭照九億萬里中上有黃臺玉樓真人號曰真元
宮中黃臺玉樓主仙華晨君姓歸珩諱妙陰光字通度
元度凝脂頭建飛晨寶冠衣青羽飛裳手執斗中青籙

坐玉樓之中若有元名方諸當得知華晨君內諱

玄冥星天之遊擊主伐逆上總九天鬼神中領北帝三
官下監萬兆伐逆不臣諸凡凶勃莫不隸焉星圖八百
里亦皆琉璃水精中有玉樹赤實金翅之所棲自生丹
芝流瑛食之一口得壽八千萬年星有三門門有四光
芒燭照九億萬里中上有朱臺玉樓出斗真人號曰紐
幽宮中朱臺玉樓元上飛蓋晨君姓冥樞諱定宣覺字
法明度搖天柱頭建三華寶晨冠衣丹錦飛裳手執命

靈之節坐玉樓之中若有元名玉格當得飛蓋晨君內
諱

丹元星天之斗君主命錄籍上總諸天譜錄中統鬼神
部目下領學真兆民命籍諸天諸地莫不總統星圖七
百二十里亦皆琉璃水精中有赤樹白實金翅之所棲
自生金精冶鍊之膏食之一口得壽七萬年星有七門
門有四光芒燭照九億萬里中上有素臺金樓躡紀真
人號曰網神宮中素臺金樓躡紀真人金魁七晨君姓

上開諱冥通光字朱煥元變五道頭建七寶飛天冠衣
白錦飛帟手執青玄籙籍坐金樓之中若有元名崑臺
當得知七晨君內諱

北極星天之太常主昇進上總九天真一中統五嶽飛
仙下領學者之身凡功勤得道輪轉階級悉總之焉星
圍七百七十里亦皆琉璃水精中有黑樹白子金翅之
所棲自生玄芝水瑛食之一口壽五萬年星有八門門
有四光芒燭照九億萬里中上有玄臺玉樓步網真人

號曰紀明宮中元臺玉樓北辰飛華君姓羽靈諱長明
化字淵洞源昌上元頭建飛精華冠衣紫錦飛裳手執九
斗玉策坐玉樓之中若有元名金臺當得知飛華君內
諱

天闕星天之上帝主天地機運如四時長養天地否泰
劫會莫不隸焉星圖九百里亦皆琉璃水精中有二華
之樹五色之實金翅之所棲生自然九味芝膏食之一
口身生九色之光得壽九萬年星有一門門有九光芒

燭照九億萬里中上有九層玉樓乘龍真人號曰闕會
宮九層玉樓總雲九元北蓋晨君姓元樞諱轉光字會
元終明天徒頭建九元寶冠衣九色錦裳手執暉神之
章坐玉樓之中若有元名九天帝圖玉錄當得知北蓋
晨君內諱

輔星天尊玉帝之星也曰常常者常陽也主飛仙上總
九天下領九地五嶽四瀆神仙之官悉由之焉星圖九
百九十里亦皆琉璃水精中有青華之樹自有九音之

字上有青鳥三足鳥生自然琉璃芝瑛食之一口得與玉
帝同真星有八門交通八氣門有四光芒燭照九天之
上中有紫氣玉樓遊行三命真人號曰帝席宮中紫氣
玉樓帝尊九晨君姓精常號常無竈字元解子空正上
開延頭建飛精玉冠衣九色衣手執火鈴坐玉樓之中
若有元名上清當得知帝尊內諱

弼星太帝真星也曰空空者恒空隱也主變化無方星
圍九百九十里亦皆琉璃水精中有三華之樹自生九

天玉章上有金口之鳳口銜火鈴中生自然七曜之暉
得食暉一口與太帝同真星有九門交關九天門有四
光芒燭照八極之外無央之中也中有玉臺紫館徘徊
三陽真人號曰上尊宮中玉樓紫館帝真元晨君姓幽
空諱空無先字隱元覺冥陽暉幽寥元頭建飛天玉冠
衣九天龍衣手執帝章坐紫館之中若有元名九天當
得知帝真內諱

並上

北斗七星星間相去九千里其二陰星不見者相去八

千里也

徐整
長歷

北斗亦有九星七見二隱其第八第九是帝皇太尊精神也霍光家有典衣奴子名還車忽見二星在斗中光明非常乃拜而還遂得增年六百

玄門寶
海經

北斗七星在太微北七政之樞機陰陽之元本也故運乎天中而臨制四方以建四時而均五行也魁四星為璇璣杓三星為玉衡又曰斗為人君之象號令之主也又為帝車取乎運動之義也又魁第一星曰天樞二曰

璇三曰璣四曰權五曰玉衡六曰開陽七曰搖光一至

四為魁五至七為杓樞為天璇為地璣為人權為時玉

衡為音開陽為律搖光為星石氏云第一曰正星主陽

德天子之象也二曰法星主陰刑女主之位也三曰令

星主中禍四曰伐星主天理伐無道五曰殺星主中央

助四旁殺有罪六曰危星主天倉五穀七曰部星亦曰

應星主兵又一主天二主地三主火四主水五主土六

主木七主金又曰一主秦二主楚三主梁四主吳五主

燕六主趙七主齊

晉書

春斗為天關軫為地梁夏角為北關參為地梁

玉衡北兩星為玉繩玉之為言溝刻也瑕而不掩折而

不傷

禮斗威儀

樞為雍州璇為冀州璣為青兗州權為徐揚州衡為荆

州開陽為梁州搖光為豫州

廣雅

東斗主算西斗記名北斗落死南斗上生中斗大魁總

監衆靈

度人經

北斗魁第一星神名執一曰報陰第二星曰叶詣第三星曰視金第四星曰拒理第五星曰防忤第六星曰開

寶第七星曰招搖

一曰始酉
陽祿組

中宮大帝其精北極星含元出氣流精生物也

文耀
鉤

斗殞精王者孝行溢則見

宋書

次南斗君及七宿法老君曰南斗君姓唐名羸字宣道
太原人次西斗君及七宿法老君曰西斗君姓劉名起
字石嬰長安人次北斗君及七宿法老君曰北斗君姓陳

名奉字百萬江夏人云云在流珠中

雲笈
七籤

老君曰左司命一人也姓韓名思字元信長樂人也司錄司伐等屬焉左司命有三十六大員官右司命姓張名獲邑字子良廣陽人也司隸司刑等屬焉右司命亦有三十六大員官

上台星名虛精求上感帝王之夢及金玉念名求之必應中台星名六淳求官祿盛興念名求之必得吉遂下台星名曲生求妻妾奴婢念名求之必遂

甲從官陽神也角星神主之陽神九人姓賓名遠生衣
綠玄單衣角星宿主之乙從官陰神也亢星神主之陰
神四人姓扶名司馬馬頭赤身衣赤緹單衣帶劒亢星神
主之丙從官陽神也氐星神主之陽神十三人姓王名
師子衣青紗單衣氐星神主之丁從官陰神也房星神
主之陰神八人姓洪名寄生衣絳緋單衣房星神主之
戊從官陽神也心星神主之心星火也為工故在東方陽
神五人姓女名涂祖牛頭人身衣黃單衣帶劒心星神

主之巳從官陰神也尾星神主之陰神十一人姓涂名
徐澤兔頭人身衣青單衣尾星神主之庚從官陽神也
箕星神主之桑木者其星之精也陽神十一人姓元闕
名仲衣飄飄玉紗單衣箕星神主之辛從官陰神也南
斗星神主之陰神四人姓陽名多衣青單衣持矛南斗
星主之壬從官陽神也牛星神主之陽神十二人姓柳
名將生衣絳玄單衣牛星神主之癸從官陰神也女星
神主之陰神四人姓刁名徐字鬱子犬頭人身女星神

主之寅從官孟神也虛星神主之槐者虛星之精也孟神四人姓木名徐他鼠頭人身衣銀黑單衣帶劍虛星神主之卯從官仲神也危星神主之仲神十一人姓劉名歸生衣瓊紋單衣帶劍危星神主之辰從官季神也營室星神主之營室之內五色襍神營室天子受命之司水官星神主之季神八人姓呂名昇衣黃錦單衣營室星神主之巳從官孟神也東壁星神主之孟神七人姓石名蘇和豕頭人身衣黑單衣帶劍東壁星神主之午從官仲神也奎

星神主之仲神六人姓黑名石勝衣丹紗單衣帶劍奎
星神主之未從官季神也婁星神主之季神十三人姓
竺名遠來衣流熒單衣婁星神主之申從官孟神也胃
星神主之孟神八人姓馮名謝名衣流黃單衣帶劍胃
星神主之酉從官仲神也昴星神主之仲神四人姓張
名弩小衣綠青單衣昴星神主之戌從官季神也畢星
神主之季神姓桑名公孫帶劍衣白毛單衣畢星神主
之亥從官孟神也觜星神主之孟神十一人姓王名平

衣龍青單衣觜星神主之子從官仲神也參星神主之
仲神八人姓銅名徐舒衣黃緋單衣帶劍參星神主之
丑從官季神也井星神主之季神九人名搏陽衣黃水
單衣帶劍能致鳳凰玄武東井星神主之震乾之長男
也鬼星神主之長男神五人姓作名涂于蛇頭黑身帶劍
衣赤野單衣鬼星神主之坎乾之中子也柳星神主之
中男神四人姓角名石襄羊頭人身衣黃韋單衣柳星
神主之艮乾之少子也七星神主之少子神五人名勝

子衣飛霞單衣七星神主之巽坤之長女也張星神主
之長女神五人姓李名神子衣赤血單衣張星神主之
離坤之中女也翼星神主之中女神十人姓張名奴子
衣赭黑單衣帶劍翼星神主之兌坤之少女也軫星神
主之少女神五人姓闕名蘇子衣流黃單衣軫星神主
之並上

東方七宿一者角宿主於衆鳥二者亢宿主於出家求
聖道者三者氐宿主水主衆生四者房宿主行車求利

五者心宿主於女人六者尾宿主洲渚衆七者箕宿主
於陶師南方七宿一者井宿主於金師二者鬼宿主於
一切國王大臣三者柳宿主雪山龍四者星宿主巨富
者五者張宿主於盜賊六者翼宿主於商人七者軫宿
主須羅吒國西方七宿一者奎宿主行船人二者婁宿
主於商人三者胃宿主於婆樓迦國四者昂宿主於水
牛五者畢宿主一切衆生六者觜宿主鞞提訶國七者
參宿主於刹利北方七宿一者斗宿主澆部沙國二者

牛宿主於利利及安多鉢竭那國三者女宿主鵞伽摩
伽陀國四者虛宿主那遮羅國五者危宿主著華冠六
者室宿主乾陀羅國輸盧那國及諸龍蛇腹行之類七
者壁宿主乾闥婆善樂者大德婆伽婆

法苑珠林

爾時佉盧虱吒仙告一切天言初置星宿昴為先首衆
星輪轉運行虛空告諸天衆說昴為先首其事是不爾
時日天而作是言此昴宿者常行虛空歷四天下恒作
善事饒益我等知彼宿屬於火天是時衆中有一聖人

名大威德復作是言彼昴宿者我妹之子其星有六形
如俗剃刀一日一夜歷四天下行三十時屬於火天姓
鞞耶尼屬彼宿者祭之用酪復次置畢為第二宿屬於
水天姓頗羅墮畢有五星形如立义一日一夜行三十
五時屬畢宿者祭用鹿肉復次置觜為第三宿屬於月
天即是月天子姓毗黎伽耶尼星數有三形如鹿頭一
日一夜行十五時屬觜宿者祭用根及果復次置參為
第四宿屬於日天姓婆利失締其性大惡多於嗔怒止

有一星如婦人顰一日一夜行三十五時屬參宿者祭用醍醐復次置井為第五宿屬於日天姓私失締其星有兩形如腳跡一日一夜行十五時屬井宿者以粃米華和蜜祭之復次置鬼為第六宿屬歲星天歲星之子姓炮波那毗其性溫和樂修善法其星有三猶如諸佛胸滿相一日一夜行三十時屬鬼宿者亦以粃米華和蜜祭之復次置柳為第七宿屬於地天即姓蛇氏止有一星如婦人顰一日一夜行十五時屬柳宿者祭用乳

廉右此七宿當於東門復次置南方第一之宿其名曰
星屬於火天姓賓伽耶尼其星有五形如河岸一日一
夜行三十時屬此宿星者宜用粳米烏麻作粥祭之復
次置張為第二宿屬福德天姓瞿曇彌其星有二形如
人之腳跡一日一夜行三十時屬張宿者將毗羅婆果
以用祭之復次置翼為第三宿屬於林天姓慆陳如其
星有二形如腳跡一日一夜行十五時屬翼星者用青
黑豈煮熟祭之復次置軫為第四宿屬沙毗黎帝天姓

迦遮延竭仙人子其星有五形如人手一日一夜行三十時屬軫星者以莠稗飯而以祭之復次置角為第五宿屬喜樂天姓質多羅延尼乾闥婆子止有一星如婦人顰一日一夜行十五時屬於角者以諸華飯而祭之復次置亢為第六宿屬摩垢羅天姓迦旃延尼其有一星如婦人顰一日一夜行十五時屬亢星者當取菜豆和酥煮以用祭之復次置氐為第七宿屬於火天姓此者利多耶尼一日一夜行三十五時屬氐宿者取種種

華作食祭之右此七宿當於南門復次西方第一之宿
其名曰房屬於慈天姓阿藍婆耶尼房有四星形如瓔
珞一日一夜行三十時屬房宿者以酒肉祭之次復置
心為第二宿屬帝釋天姓羅延那心有三星形如大麥一
日一夜行十五時屬心星者以糲米粥而用祭之次復
置尾為第三宿屬獵師天姓迦遮耶尼尾有七星形如
蝎尾一日一夜行三十時屬尾星者以諸果根作食祭
之次復置箕為第四宿屬於水天姓持乂迦旃延尼箕

有四星形如斗角一日一夜行三十時屬箕宿者取尼
拘陀皮汁祭之次復置斗為第五宿屬於火天姓摸伽
邏尼斗有四星如人拓地一日一夜行四十五時屬斗
宿者以秬米華和蜜祭之次復置斗為第六宿屬於梵
天姓梵嵐摩牛有三星形如牛頭一日一夜行於六時
屬牛宿者以醍醐而用祭之次復置斗為第七宿屬毗
紐天姓帝利迦遮耶尼女有四星如大麥粒一日一夜
行三十時屬女宿者以鳥肉祭之右此七宿當於西門

次復置北方第一之宿名為虛星屬帝釋天娑婆天子
姓憍陳如虛有四星其形如鳥一日一夜行三十時屬
虛星者煮烏豈汁而用祭之次復置危為第二宿屬多
羅拏天姓單那尼一日一夜行十五時屬此宿者以粃
米粥而用祭之次復置室為第三宿屬蛇頭天蝎天之
子姓闍都迦尼拘室有二星形如腳跡一日一夜行三
十時屬室宿者以肉血祭之次復置壁為第四宿屬林
天婆婁那子姓陀難闍壁有二星形如腳跡一日一夜

行四十五時屬壁星者以肉祭之次復置奎為第五宿

屬富沙天姓阿虱吒排尼奎有一星如婦人顰一日一

夜行三十時屬奎宿者以酪祭之次復置婁為第六宿

屬乾闥婆天姓阿舍婆婁有三星形如馬頭一日一夜

行三十時屬婁星者以大麥飯并肉祭之次復置胃為

第七宿屬闍摩羅天姓跋伽毗胃有三星形如鼎足一

日一夜行四十時屬胃宿者以粃米烏麻及野棗而用

祭之右此七宿當於北門上

水星姓湍名炎字神靈火姓炎名九鼎字光天木姓艾
名用字道輝金姓魯名遂字德璋土姓司名辯字道后日
姓孫名開字子真月姓唐名末字天賢計姓翁名若字
天真炁姓高名華字俊夫羅姓馬名元字伯惟亭姓忠
名炎字忠應

雲笈
七籤

五星合狼張晝視無日光虹蜺煌煌太山失金雞西嶽
亡玉羊太山失金雞者箕星亡也箕者風也風動雞鳴
今箕侯亡故雞亦亡也西嶽亡玉羊者星在未為羊雞

失羊亡臣縱恣萬人愁不祥

易是類謀

昂者天之耳也主西方故爾雅曰西陸昂也

宋書

火星與昂星出入昂星低時火星出昂星見時火星伏

非火之性厭伏昂也時偶不並度轉乖也正月建寅斗

魁破申非寅建使申破也轉運之衡偶自應也

論衡

箕為天口主出氣尾為逃臣賢者叛十二諸侯列於庭

詩汎歷樞

有星守三淵大水地動海魚出

天官占

維星散句星信則地動散者不相從也

上

太白上公妻曰女嬃居南明天下祀之曰明星

甘石星經

軫星逐鬼張星拘鬼東井還鬼

抱朴子

魚星主理陰陽事知雲雨之期也故讚曰漢中魚星知

雲雨也占曰魚星明大河海水皆出

謝承後漢書

五車者五帝車舍也三柱一曰三泉天子得靈臺之禮

則五車三柱均明有常

晉書

四輔四星在紫微宮中抱之細星此為輔臣之位贊於

萬機其占以小而明則吉若微闇則官不理也

鈎陳六星在紫微宮中華蓋之下天帝所居之宮亦護軍將軍之象占以明則吉

華蓋七星其柱九星合十六星如蓋狀在紫微宮中臨鈎陳以蔭帝座占者正則吉若傾則凶也

女史一星在紫微宮內柱史北此婦人之官掌記宮中之事占以明則為女史直詞若不明則反是

柱下史一星在紫微宮內近尚書此左右掌記君之過其占以明則為史直詞若不明則詞不依過無真寔也

尚書五星在紫微宮內東南之隅此八座大臣之象故
讚曰尚書納言夙夜詔謀占以小而明則君臣和

宦者四星次帝座西南主侍者帝旁闡人也占以不明
則吉若明則內臣專權

勢四星在太陽西北主刑餘人而用事者也占以不明
為吉若明則闡官用權

輔一星附北斗杓第六星大臣之象也占欲其小而明
則吉若大而明則臣奪君政若小而不明則臣不任職

若明大與斗合者則國兵暴起也

五諸侯五星主刺舉戒不虞一曰帝師二曰帝友三曰三公四曰博士五曰太史此五者常為帝定疑議

東壁二星主文章天下圖書之祕府也星明王者興道術行國多君子星失色大小不同王者好武經士不用圖書隱星動則有土功

並上

進賢一星在平旦西垣星明賢士用進暗小人用

星經

帝席三星在大角北星暗天下安星不欲明明則王公

山

女床三星在天紀北主後宮明則宮人自恣

扶匡七星在天柱東主桑蠶之事

離珠五星在女北主藏府以御後宮移則亂

褱褕三星在秦代東南列北主王侯衣服

傳說一名太祝

並上

織女星主瓜果

春秋元命苞

運斗樞云牽牛神名畧石氏星經云牽牛名天關佐助

期云織女神名收陰

河鼓一名三武

荊州星占

匏瓜明則歲大熟

上。又天文要集云匏瓜為天子果園

農丈人一星在南斗南主農正官也占明則為豐稔若

暗則為歉

晉書

筆星星氣有一枝末銳似筆也

釋名

咸池主五穀其星五者各以其職以精委為國也

元命苞

天有卷舌之星人有緘口之銘

劉子

昆弟有親親之恩則鈎鈐不離房

孝經內事。宋均曰鈎鈐遠房則疎闊今

昆弟相親故相近也

帝命驗曰有人雄起戴玉英履赤矛

鄭玄注曰赤矛瑞星名

瑞星有十二一日景星二曰周伯三曰含譽四曰王蓬

芮五曰格澤六曰元保七曰昭明八曰昏昌九曰旬始

十曰司危十一曰菟昌十二曰地維臧光瑞星五行之冲

和氣也五行順樂旺相喜合之所生也周伯王蓬芮皆

古者高世不仕之人王其姓蓬芮其名周伯其姓字也

其精為星帝命之為瑞星然考之晉志瑞星止四星其

周伯又於客星見之無王蓬芮而客星則有王蓬絮芮

所至之國非福也而三家所言妖星則別有蓬星焉曰

蓬芮曰蓬絮芮曰蓬星其言禍福不同豈各有據乎又

晉志無元保以下七星其昭明司危地維臧光則皆為

妖星若隋志則因晉志而又無格澤疑當從晉志

通志

天樞得則景星見衡星得則麒麟生萬人壽

春秋運斗樞

作樂制禮得天心則景星見也

禮稽命圖

景星者天曜也狀如半月生於晦朔助月為明王者不

私人則見

曜音精孫氏瑞應書

歸邪如星非星如雲非雲或曰星有兩赤彗上向有蓋
下連星見必有歸國者昌光赤如龍狀聖人起帝受終

則見

晉書

祥氣昌光握譽可錯持勝履子

廣雅

妖氣格澤旬始僂譎天狗枉天氣侵冠珥上

若星與日並出名曰嫁女星與日爭光武且弱文且強

女子為王在邑為喪在野為兵

晉書

流星之類有音如炬火下地野雉鳴斯天保也所墜國
安有喜流星色青赤名曰地雁其所墜者起兵流星有
光青赤曰天雁軍中之精華也

流星大如缶其光赤黑有喙者名曰梁星其所墜之鄉有
兵君失地飛星大如缶若瓦後皎然白前卑後高此謂
頓頑其所從者多死亡削邑而不戰有飛星大如缶若
瓦後皎然白前卑後高搖頭乍上乍下此謂降石所下

民食不足飛星大如缶若瓦後皎然白星滅後白者曲
環如車輪此謂解銜其國人相斬為爵祿有飛星大如
缶若瓦其後皎然白長數丈星滅後白者化為雲流下
名曰大滑所下有流血積骨有飛星大如缶若瓦後皎
白縵縵然長可十餘丈而委曲名曰天刑一日天師將
軍殉封疆

歲星之精流為天棓天槍天猾天衝國皇及登蒼雉熒
惑散為昭旦蚩尤之旗昭明司危天欖赤雉填星散為

五殘獄漢大賁昭星絀流旬始蚩尤虹蜺擊咎黃彗太白散為天杵天杼伏靈大敗司姦天狗天殘卒起白彗辰星散為枉天破女拂樞滅寶繞經驚理大奮祀黑彗

並上

國有搶星其君必辱國有彗星必有流血浮丘之戰彗之所出必服天下之讐

管子

漢京房著風角書有集章所載妖星皆見於月旁互有五色方雲以五寅日見各有五星所生云天槍天根天荆

真若天棓天樓天垣皆歲星所生也見以甲寅其星咸
有兩青方在其旁天陰晉若官張天惑天崔赤若蚩尤
皆熒惑之所生也出在丙寅日有兩赤方在其旁天上
天伐從星天樞天翟天沸荆彗皆填星之所生也出在
戊寅日有兩黃方在其旁若星帚星若彗竹彗牆星棓
星白翟皆太白之所生也出在庚寅日有兩白方在其
旁天美天鼈天社天麻天林天蒿端下皆辰星之所生
也出以壬寅日兩黑方在其旁此三十五星即五行氣

所生皆出於月左右方氣之中各以其所生星將出不
出日數期候之當其未出之前而見見則有水旱兵喪
饑亂所指亡國失地王死破軍殺將

文獻
通考

凡妖星五行之乖戾氣也五行掩合陵犯怒逆錯亂離
散雜變之所生也孛本黃帝時一女子脩行不得其死
蚩尤則黃帝所誅者亦五行戾氣之所蓄結而為之者
也按申須公羊杜預郭璞俱以彗孛為一星左氏昭公
十七年有星孛於大辰魯申須曰彗所以除舊布新也

公羊曰孛者何彗星也文公十四年有星孛於北斗杜預曰孛彗也郭璞釋爾雅曰彗妖星也亦謂之孛綜其實不然彗孛長三星其占畧同而其形少異孛星光芒短其光四出蓬蓬孛孛然彗星光芒長參之如掃帚長星光芒有一直或竟天或十丈或三十丈宋均注鉤命訣曰彗五彗也蒼則王侯破天子苦兵赤則賊起強國恣黃則女害色權奪於后妃白則將軍逆二年兵大作黑則河決賊處處起史記彗出東井東井齊分景公以

為憂晏子曰君高臺深池賦歛如弗得刑罰恐弗勝孛
星將出彗星何懼乎然則孛甚彗也董仲舒曰孛者乃
非常惡氣之所生也大率孛彗為除舊布新火災長星
為兵革事^上

旬始出北斗旁如雄雞其怒有青黑為伏鼈或曰怒雌
也主爭兵^{晉書}

東北有三大星出名曰女帛見則有大喪^上

彗星無光假日之光故夕見則東指晨見則西指^{正義}

國有兵凶則星墜為鳥獸天下將亡則星墜為飛虫天下大兵則星墜為金鐵天下有水則星墜為土國主亡有兵則星墜為草木兵起國主亡則星墜為沙星墜為人而言者善惡如其言又曰國有大喪則星墜為龍隋書唐堯為政七十餘載然後景星擣耀

堯遭大水填星逆行入水府

大象賦注

仲尼曰吾聞堯率舜等遊首山觀河渚有五老遊焉一老曰河圖將來告帝期二老曰河圖將來告帝謀三老

曰河圖將來告帝書四老曰河圖將來告帝圖五老曰
河圖將來告帝符龍御玉芭金泥玉檢封盛書咸曰知
我者重瞳姚黃五老因飛為流星上入昴

論語
識

帝堯時有五星自天而實一是土之精墜於穀城山下
其精化為圮橋老人歲星之精墜於荆山化而為玉側
而視之色碧正而視之色白卞和得之獻楚王火星之
精墜於南海中為大珠光照數百里紅氣亘天今名其
地為珠池金星之精墜於終南圭峯之西因號為太白

山其精化為白石狀如美玉時有紫氣覆之水星之精墜於張掖郡柳谷中化為黑石漢之末漸有文彩未甚分明魏青龍年忽如雷震聲聞百餘里其石自立白色為文有牛馬僊人之狀及玉環玉玦兼文字果應司馬氏為晉以符金德焉

錄異記

虞舜在位十年有五老遊於國都舜以師道尊之言則及造化之始舜禪於禹五老去不知所從舜乃置五星之祠以祭之其夜有五長星出薰風四起連珠合璧祥應

備焉

拾遺記

張淵賦云嘉黃星之靡鋒明虞舜之不競

注舜將受禪先有星見員

而無鋒芒示揖讓而受不以兵事競也

桀末年兩日並鬪五星交錯枉矢流火神見闕龍逢引

黃圖諫不聽焚圖誅逢

路史

武王伐紂魚辛諫曰歲星在北方不北征武王不從

太公釣於磻溪夜夢北斗神告以伐紂之意

尚書中候

周將伐殷五星聚房齊桓將霸五星聚箕漢高入秦五

星聚東井四星聚柳張而光武興復於洛

宋志

周公黃錄記太白下為王公然歲星變為甯壽公等所

見非一家

劉向列仙傳序

微子感牽牛星顏淵感中台星張良感孤星樊噲感狼

星老子感火星

劉子。佐助期云蕭何稟昂星

周厲王時北斗與三台並流不知其所厲王沒後兩主

星復見

獨異志

莊公七年甲午四月辛卯夜恒星不見星隕如雨即周

莊王十年也遂即易筮之云西域銅色人出也所以夜

明非中國之災也

莊王別傳

周襄王不能字其母弟彗入斗亡其度

孝經鉤命訣

昔管仲與鮑叔牙商賈於南陽見三星聚虛危之分知

齊將有霸主遂共戮力來投齊地

觀象賦注

齊有彗星齊侯使祝禳之晏子曰無益也祇取誣焉天

道不諂不貳其命若之何禳之也且天之有彗以除穢

也君無穢也又何禳焉若德之穢禳之何益

一作損詩云

惟此文王小心翼翼昭事上帝聿懷多福厥德不回以受方國君無違德方國將至何患於彗詩曰我無所監夏后及商用亂之故民卒流亡若德之回亂民將流亡祝史之為無能補也公說乃止

新序

按天官曰背水陳為絕紀向阪陳為廢軍武王伐紂背濟水向山阪而陣以二萬二千五百人擊紂之億萬而滅商豈紂不得天官之陳哉楚將公子心與齊人戰時有彗星出柄在齊柄所在勝不可擊公子心曰彗星何

知以彗鬪者因倒而勝焉明日與齊戰大破之

尉繚子

秦始皇帝三十六年熒惑守心有星墜下至地為石刻其石曰始皇死而地分始皇聞之令御史逐問莫服盡取石旁家人誅之因燔其石妖

漢武帝祀甘泉至渭橋有女子浴於渭乳長七尺上怪而問之女曰帝後第七車侍中知我所來時張寬在第七車對曰夫星主祭祀者齋戒不嚴則女人星見

益部耆舊傳

東方朔太白星精黃帝時為風后堯時為務成子周時

為老子越為范蠡齊為鴟夷言其變化無常也

集仙傳

東方朔云天下無知我者唯歷官大伍公知之帝召問

之曰諸星在唯歲星不見

西京雜記

武帝元狩中有日者奏太乙星不見帝召東方朔問其

由朔奏曰是星不見則遊於世為居民福壽帝曰何以

驗之朔曰陛下使人於江海之濱設禮祭而迎之或乘

舟或控鶴特異於常者則為驗見則斫竹建壇醮謝之

帝如奏朔日迎之是月果有會稽太守奏海中有仙人

角面如玉色乘一葉紅蓮約長丈餘偃卧其中手持一黃書自東海浮來臣等焚香迎拜俯及百步俄而雲霧所遮後霧散不知所之遺其黃書飄至亭側進於帝帝令朔驗之曰此上界火珠經也或曰連珠

漢遺史

帝嘗見彗星東方朔折指星之木以授帝帝以木指彗星星尋則沒也星出之夜野獸皆鳴別說謂之獸鳴星

洞冥記

郭翰嘗遇織女降其室衣玄霄之衣霜羅之帔翹鳳金

之冠躡瓊文九章之履張霜霧丹轂之幃施九晶玉華之輦轉會風之扇有同心龍枕翌日丹鉛書青縑一幅

以寄翰

東方朔神異記

孫休永安三年將守質子羣聚嬉戲有異小兒忽來言曰三公鋤司馬如又曰我非人熒惑星也言畢上昇仰視若曳一匹練有頃沒後四年而蜀亡六年而魏廢二十一年而吳平於是九服歸晉魏與吳蜀並戰國三公鋤司馬如之謂也

晉書

司星奏曰三台星墜於蜀化為三井遣使人驗之撞麗
譙鐘聲為度而汲之各使人候於井遂汲一而兩動上
劉聰淫泆無度時有星隕平陽化為肉羣臣諫以淫色
所致聰曰自是天家事於朕何干

十六國
春秋

秦苻生時太白犯東井有司奏東井秦之分也太白罰
星必有暴兵起於京師生曰星入井者必將渴耳何所
怪

晉書

晉建元十三年正月太史奏云有星見外國分野當有

大德智人入輔中國苻堅曰朕聞西域有鳩摩羅什將
非此耶即遣外求之

神僧傳

晉太元中有妖星現帝普下諸國有德沙門精勤佛事
令懺穢災曇猷乃祈誠冥感至六日旦見青衣小兒來
悔過云便退去毋勞法師是夕星退以太和之末卒於
山室屍猶生而舉體綠色

僧慧紹為僧通法華經苦行堅節後隨師僧要止臨行
招提寺常念佛恩之重誓欲捨身以報尅日就山建八

關齋會闔境奔赴雲滿山谷至山紹自行香執燭燃薪
入龕而坐誦藥王捨身品火沿至額猶聞經聲大眾忽
見一星大如斗直下火中俄而升天紹嘗謂同學曰吾
燒身處當生梧桐木切莫伐之後三日果爾而生並上
桓玄母馬氏嘗與同輩夜坐於月下見流星墜銅盆水
中忽如二寸火珠罔然明淨競以瓢接取馬氏得而吞
之若有感遂有娠及生玄有光照室占者奇之故小名

靈寶

晉書


容城令徐路善占候世宗時坐事繫冀州獄別駕崔隆宗就禁慰問路曰昨夜驛馬星流計赦即時應至隆宗遣人試出城候馬俄而赦至時人重之

後魏書

源師字踐言為尚書郎攝祠部後屬孟夏以龍見請雩時高阿那肱為錄尚書事謂為真龍出見大驚喜問龍所在云作何顏色師整容云此是龍星初見依禮當雩祭郊壇非謂真龍別有所降阿那肱忿然作色曰漢兒多事強知星宿祭事不行師出竊歎曰國家大事在祀

與戎禮既廢也其能久乎齊亡無日矣

北史



廣博物志卷二